

Voces de Queempostela

Folleto Mensual
de Información

Nº18, Xaneiro-1997

Editado polo
Colectivo Gai de
Compostela

Festa en "Factoria"

O vindeiro venres 30 de xaneiro o CGC, en colaboración co BOGA (antes Colectivo de Lesbianas Independentes), organizará unha festa na discoteca "Factoria", sita na rua Gómez Ulla da cidade de Compostela. A máis do habitual xogo de mensaxes, actuarán coñecidas Drag-Queens: confirmaron a súa presenza na festa Hilária a Proscrita, Elvira a Galáctica e Visiosa Aghrú. Nesta festa o CGC e o BOGA presentarán o folleto da campaña "FOLLA de reclamacións" sobre discriminación homófoba nos espazos de consumo. O BOGA presentará tamén un folleto informativo sobre as súas actividades. A festa comezará ás 23:00 e a entrada custará 200 pts.

FOLLA... de reclamacións

O CGC e o BOGA presentan a finais deste mes a súa campaña conxunta "FOLLA... de reclamacións". Trátase dunha campaña de información para concienciar a comunidade homosexual galega da necesidade de loitar e denunciar as discriminacións homófobas que se producen en tendas, bares, discos, medios de transporte, etc... O traballo conxunto das dúas asociacións homosexuais comezara na primavera do ano pasado e desembocou na elaboración do folleto informativo que agora se presenta. Este folleto repartirase por varios locais de ambiente de Compostela e Vigo. Nas vindeiras semanas CGC e BOGA poráanse en contacto con Mil-Homes, GALEGA e Libertacom Homossexual para asegurar a difusión da campaña pola Coruña, Lugo e Ourense.



Propostas lingüísticas

No seo do CGC iniciouse-se durante este mes de xaneiro un debate sobre o estilo e formas da escrita que debe aplicar a asociación nas súas publicacións. O debate xira ao redor da utilización da arroba (@), do tratamento en feminino, do uso de léxico gai elésbico, etc... A este debate ven de se sumar o grupo ourensán Libertacom Homossexual enviando-lle ao CGC unha serie de propostas ortográficas e de estilo. Se queres participar no debate, pasa polo local no horario de permanencias ou escribe ao apartado ou ao noso enderezo electrónico.

Petit na Galiza

Jordi Petit, o co-Secretario Xeral da ILGA (International Gay and Lesbian Association) estivo a mediados deste mes de xaneiro no noso país convidado por Estudantes Solidari@s para participar nunhas xornadas sobre os dereitos de gais elésbicas nos países non occidentais. En concreto, Petit estivo en Lugo e Compostela, onde intercambiou impresións con membros do CGC e do BOGA. A comisión do S'homos fixo-lle unha longa entrevista para o (retrasado) número 14 da revista. Petit declarou apoiar a formación de bairros homosexuais nas cidades, proceso que ve como lóxico e inevitábel, para reforzar o artellamento das comunidades gais elésbicas locais.

Do CLI ao BOGA

No seu proceso de legalización e reestruturación o Colectivo de Lesbianas Independentes (CLI) decidiu mudar de nome para o de BOGA/Colectivo de

Lesbianas de Galicia. A máis de continuaren o seu proceso de legalización, as activistas do BOGA xa elaboraron un folleto de presentación no que se explican os obxectivos e actividades da asociación. Tamén iniciaron unha reorientación das estratexias de autofinanciamento coa definición do novo status das sócias e a solicitude de subvencións oficiais. Unha das prioridades actuais do BOGA é a de conseguir un local en Compostela onde poder pór á disposición daslésbicas unha serie de servizos e un lugar de encontro e debate. Polo de agora, o BOGA xa dispón un apartado de correos (o nº2169 / CP 15780 de Compostela) ao que te podes dirixir. Tamén podes enviar unha mensaxe ao seguinte enderezo de correo electrónico: lesbicompos@hotmail.com



Volve o Centro Xove

O Centro Xove de Anticoncepción e Sexualidade, que pechara as súas portas o ano pasado por se negar a Xunta a financiar as súas actividades, conseguiu o apoio do Concello de Santiago para reiniciar o seu traballo. Así, o pasado 26 de xaneiro o Centro Xove abriu o seu novo local, sito na rua do Hórreo nº39, baixo interior. O novo horario de atención será de 16:30 a 20:00 todas as segundas (luns) e quintas (xoves) feiras. O Centro Xove tamén pon á disposición da cidadanía o seguinte número de teléfono: 981-580466.

Anuário de estudos

A asociación socio-cultural "Blanco-Amor", criada no seo do CGC, xa recibeu todas as colaboracións para a edición do primeiro anuário de estudos gais elésbicos da Galiza e posibelmente do Estado Español. Nas vindeiras

semanas comezará a fase de maquetación do anuário, que conta coas aportacións de profesores e estudantes das universidades galegas. O anuário está subvencionado pola Dirección Xeral de Política Lingüística. Se queres aportar artigos de investigación ou reflexión teórica, envía-os ao apartado do CGC ou por correo electrónico.

A ILGA-Portugal responde

Na última semana de xaneiro chegou-lle ao CGC un paquete procedente da ILGA-Portugal con información e folletos sobre as actividades que desenvolve este colectivo portugués. Con isto estreitan-se as relacións coa comunidade homosexual do país veciño. O CGC pensa propor-lle á ILGA-Portugal axuda para a difusión das súas campañas no noso país. Se queres recibir cópias do material enviado, pasa polo local ou escribe ao apartado ou ao enderezo electrónico.

CGC e os servizos sociais

Unha vez rematado o proceso legal de mudanza dos cargos na directiva da asociación, o CGC ten pensado rexistrarse na Xunta como entidade prestadora de servizos sociais. Con isto, o CGC pretende abrir unha vía de diálogo coas institucións para conseguir o seu apoio na creación dun servizo de atención telefónica, na mellor formación do voluntariado e no financiamento de novas campañas. Ata o de agora, o CGC só recibiu o apoio da Dirección Xeral de Política Lingüística e nunca se puxera en contacto nen coa Consellería de Muller, Familia e Xuventude nen coa de Sanidade e Servizos Sociais.

Xa Sabes...
Escribe ao apartado 191 / CP 15780 Compostela ou por e-mail: gaicompos@hotmail.com
OU...
Pasa polo noso local: Rua Entremuros, nº 16, baixo luns, mércores e xoves a partir das 20:30

